

սօր մտում են հայոց հսկաների մեծագործ շինածքների փշրանքները, որ ժողովրդի մեջ յայտնի են Հայկայ բերդ անունով:

– Ինչպե՞ս է այդ սարի անունը, – հարցրի Ասլանից:

– Բոգ-դադ, որ նշանակում է մոխրագոյն սար, թուրքաց անուն է, – պատասխանեց նա, յետոյ ավելացրեց. – թուրքերը, տիրելով մեր երկրին աշխատեցին բոլորը, ինչ որ մեզ համար սուրբ էր եւ նոիրական, ջնջել եւ ոչնչացնել: Աշխատեցին, ա՛յն բոլորը, որ հային յատուկ էր, որ ազգային էր, օտարացնել, խորթացնել: Նրանք փոխեցին մեր լեռների, մեր գետերի, մեր հովիտների ու մեր գիւղերի անունները: Այդ երկիրը, որ մեր ազգի նախկին օրօրոցն է եղել եւ մինչեւ այսօր բնակեցրած է հայերով, նրանք Քուրդիստան կոչեցին:

– Բայց ինչպե՞ս էր այդ սարի հին անունը:

– Դժբախտաբար չգիտեմ: Այդ մասին գրքերի մեջ ինձ ոչինչ չէ պատահել կարդալ, իսկ ժողովուրդը մոռացել է:

Զիաներով անհնար էր բարձրանալ սարը: Տած իջանք, երկու երիտասարդները ներթելում պահեցին ձիաները, ես եւ Ասլանը սկսեցինք վեր բարձրանալ: Ժամանակը մաշել ու եղծել էր բոլոր շաւիղները, որ տանում էին դեպի վեր: Մենք համարեա մագլցելով էինք անցնում սարսափելի առապարները, ուղղաձիգ ժայռերը, նեղ կիրճերը եւ աճած, միմեանց հետ հիւստած թուփերն ու մացառները, որ հանդիպում էին մեր ճանապարհի վրայ: Բայց այդ ահագին դժոարութիւնները հեշտանում, բոլորովին անզգայի էին դառնում այն մեծ բաղձանքի ուժգնութեան ներքոյ, որ տիրում էր իմ մեջ՝ տեսնելու մեր նախահոր նոիրական ամրոցը, որտեղ ապրել էր նա, որտեղից պատերազմել էր իր ժամանակի խօլ եւ վիթխարի տիտանների հետ, պաշտպանելով իր գերդաստանը, որ երեք հարիւր հոգուց էր բաղկանում: Այդ երեք հարիւր հոգին կազմում էր այդ ժամանակ հայոց ամբողջ ազգը: Այդ երեք հարիւր հոգով տիրեց նա Հայաստանը: Դարերի, մի քանի տասնեակ դարերի, սասանմունքից ու աներմունքից յետոյ դեռ շատ բան էր մնացել, որ յիշեցնում էր հսկայ ձեռքի հսկայական գործը: Հանդիպում էինք արհեստական այրերի, որոնց ծայրը կորչում էր լեռան խորքերում, եւ որոնք ծառայելիս են եղել որպէս գաղտնի հաղորդակցութեան անցքեր: Հանդիպում էինք վիմափոր ջրամբարների, որոնց մեջ զանազան կողմերից խողովակներով հաւաքւում էր անձրեւի ջուրը եւ պահւում էր պաշարման ժամանակի համար, որովհետեւ լեռան վրայ աղբիւր չկար: Հանդիպում էինք զանազան մթերանոցների, որոնց մեջ պահւում էր թէ պաշար եւ թէ զէնքեր: Երկայնաձիգ լեռը, որ ներթելից դանակի նման սուր էր երեւում, վերեւում հետզհետէ ընդար-